

Հավելված  
ՀՀ կառավարության 2011 թվականի  
հունիսի 30-ի N 979 - Ն որոշման

ՀԱՆՐԱՅԻՆ ՏՎՅԱԼՆԵՐԻ ԲԱԶԱՆԵՐԻ ՑԱՆԿԸ, ԱՅԴ ՏՎՅԱԼՆԵՐԻ  
ԲԱԶԱՆԵՐԻՑ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՏԱՐԱԾՔՈՒՄ ԳՈՐԾՈՂ  
ՎԱՐԿԱՅԻՆ ԲՅՈՒՐՈՆԵՐԻՆ ՏՐԱՄԱԴՐՎՈՂ ՏՎՅԱԼՆԵՐԻ ՏԵՍԱԿՆԵՐԸ,  
ԾԱԽՍԵՐԻ ՓՈԽՀԱՏՈՒՑՄԱՆ ՀԱՐՑԸ, ՏՎՅԱԼՆԵՐԻ ՏՐԱՄԱԴՐՄԱՆ  
ԿԱՐԳԸ, ՊԱՅՄԱՆՆԵՐԸ ԵՎ ՏՐԱՄԱԴՐՄԱՆ ՀԱՄԱՐ ՊԱՏԱՍԽԱՆԱՏՈՒ  
ՄԱՐՄԻՆՆԵՐԸ

I. ԸՆԴՀԱՆՈՒՐ ԴՐՈՒՅԹՆԵՐ

1. Սույն իրավական ակտով սահմանվում են այն հանրային տվյալների բազա-  
ների ցանկը, որոնցից տվյալներ են տրամադրվում վարկային բյուրոյին, այդ տվյալների  
բազաներից տրամադրվող տվյալների տեսակները, ծախսերի փոխհատուցման հարցը,  
տվյալների տրամադրման կարգը, պայմանները և տրամադրման համար պատասխա-  
նատու մարմինները:

2. Սույն իրավական ակտում օգտագործվող հասկացությունները կիրառվում են  
«Վարկային տեղեկատվության շրջանառության և վարկային բյուրոների գործունեու-  
թյան մասին» Հայաստանի Հանրապետության օրենքով սահմանված իմաստներով:

II. ՀԱՆՐԱՅԻՆ ՏՎՅԱԼՆԵՐԻ ԲԱԶԱՆԵՐԻ ՑԱՆԿԸ

3. Հայաստանի Հանրապետության տարածքում գործող վարկային բյուրոներին  
տրամադրվում են տվյալներ հետևյալ տեսակների տվյալների բազաներից՝

1) Հայաստանի Հանրապետության կառավարությանն առընթեր Հայաստանի Հանրապետության ոստիկանության անձնագրային և վիզաների վարչության, ինչպես նաև Հայաստանի Հանրապետության կառավարությանն առընթեր Հայաստանի Հանրապետության ոստիկանության «Ճանապարհային ոստիկանություն» ծառայության տեղեկատվական համակարգերից.

2) Հայաստանի Հանրապետության աշխատանքի և սոցիալական հարցերի նախարարության կողմից ստեղծված կամ կառավարվող սոցիալական ապահովության քարտերի տեղեկատվական բազայից և սոցիալական ապահովության պետական ծառայության պետական կենսաթոշակային սոցիալական ապահովագրության համակարգում ընդգրկված անձանց տվյալների անհատական (անձնավորված) հաշվառման (այսուհետ՝ անձնավորված հաշվառում) բազայից.

3) Հայաստանի Հանրապետության կառավարությանն առընթեր պետական եկամուտների կոմիտեի կողմից ստեղծված կամ կառավարվող հարկ վճարողների տեղեկատվական համակարգից.

4) քաղաքացիական կացության ակտերի պետական գրանցման մարմինների կողմից ստեղծված կամ կառավարվող տեղեկատվական համակարգից:

**III. ՀԱՆՐԱՅԻՆ ՏՎՅԱԼՆԵՐԻ ԲԱԶԱՆԵՐԻՑ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՏԱՐԱԾՔՈՒՄ ԳՈՐԾՈՂ ՎԱՐԿԱՅԻՆ ԲՅՈՒՐՈՆԵՐԻՆ ՏՐԱՄԱԴՐՎՈՂ ՏՎՅԱԼՆԵՐԻ ՏԵՄԱԿՆԵՐԸ, ՏՐԱՄԱԴՐՄԱՆ ՀԱՄԱՐ ՊԱՏԱՍԽԱՆԱՏՈՒ ՄԱՐՄԻՆԸ, ՏՐԱՄԱԴՐՄԱՆ ԿԱՐԳԸ**

4. Հայաստանի Հանրապետության կառավարությանն առընթեր Հայաստանի Հանրապետության ոստիկանության անձնագրային և վիզաների վարչության տեղեկատվական համակարգից տրամադրվում են անձի անձնագրի համարը, սերիան, տրամադրման ամիսը, ամսաթիվը, տարեթիվը, տրամադրող մարմնի համարը, անձնագրի

վավերականության ժամկետը, անձի անունը, ազգանունը, առկայության դեպքում հայրանունը, բնակչության պետական ռեգիստրում առկա հաշվառման հասցեն: Նոր անձնագրի տրամադրման դեպքում տրամադրվում են նոր անձնագրի՝ սույն կետում նշված տվյալները: Հայաստանի Հանրապետության կառավարությանն առընթեր Հայաստանի Հանրապետության ոստիկանության «Ճանապարհային ոստիկանություն» ծառայության տեղեկատվական համակարգից տրամադրվում է իրավախախտման համար նշանակված և ժամկետում չվճարված (Հայաստանի Հանրապետության օրենսդրությամբ սահմանված տուգանքը վճարելու համար նախատեսված ժամկետների վերջին օրվան հաջորդող օրվա դրությամբ չվճարված) տուգանքների մասին տեղեկատվությունը: Այդ տեղեկատվությունը ներառում է տուգանքի ենթարկված անձի անձնագրի համարը, սերիան, անունը, ազգանունը, վարորդական վկայականի համարը, տալու տարեթիվը, ամիսն ու ամսաթիվը, չվճարված տուգանքի չափը, չվճարման տարեթիվը, ամիսը, ամսաթիվը:

5. Հայաստանի Հանրապետության աշխատանքի և սոցիալական հարցերի նախարարության կողմից ստեղծված կամ կառավարվող սոցիալական ապահովության քարտերի տեղեկատվական բազայից տրամադրվում են անձի սոցիալական քարտի համարը, անձի անունը, ազգանունը, հայրանունը, անձնագրի համարը, սերիան: Սույն կետով սահմանված տվյալները տրամադրվում են Հայաստանի Հանրապետության աշխատանքի և սոցիալական հարցերի նախարարության ենթակայության «Նորք» տեղեկատվավերլուծական կենտրոն» միանձնյա պետական մասնակցությամբ փակ բաժնետիրական ընկերության միջոցով:

6. Հայաստանի Հանրապետության կառավարությանն առընթեր պետական եկամուտների կոմիտեի կողմից ստեղծված կամ կառավարվող հարկ վճարողների տեղեկատվական համակարգից տրամադրվում են անձի կողմից չվճարված ժամկետանց (Հայաստանի Հանրապետության օրենսդրությամբ սահմանված հարկերը վճարելու

համար նախատեսված ժամկետների վերջին օրվան հաջորդող օրվա դրությամբ չվճարված) հարկային պարտավորությունների մասին տեղեկատվությունը, հարկ վճարողների հաշվառման համարները: Հարկային պարտավորությունների մասին տեղեկատվությունը ներառում է հարկային պարտավորության տեսակը, չվճարման տարեթիվը, ամիսը, ամսաթիվը, չվճարված գումարի չափը, չվճարող անձի անունը, ազգանունը (իրավաբանական անձի դեպքում դրա անվանումը): Իսկ եթե անձը չունի ժամկետանց հարկային պարտավորություն, ապա տրամադրվում է նաև տեղեկատվություն այն մասին, որ անձը չունի ժամկետանց հարկային պարտավորություն:

7. Հայաստանի Հանրապետության աշխատանքի և սոցիալական հարցերի նախարարության սոցիալական ապահովության պետական ծառայությունը տրամադրում է անձի կողմից կամ նրա համար կատարված սոցիալական ապահովության վճարների չափը՝ ըստ անձնավորված հաշվառման տվյալների բազայում առկա տեղեկատվության: Այդ տեղեկատվությունը ներառում է նաև անձնագրի համարը, սերիան, անունը, ազգանունը, վճարման ժամանակահատվածը:

8. Սույն իրավական ակտի 3-րդ կետի 4-րդ ենթակետով սահմանված քաղաքացիական կացության ակտերի պետական գրանցման մարմինների կողմից ստեղծված կամ կառավարվող տեղեկատվական համակարգից տրամադրվող տեղեկատվությունը ներառում է անձի մահվան պետական գրանցման մասին և անձի անվան փոփոխման մասին տեղեկությունները:

9. Սույն իրավական ակտի 4-րդ կետով սահմանված տվյալների տրամադրման պատասխանատու մարմինն է Հայաստանի Հանրապետության կառավարությանն առընթեր Հայաստանի Հանրապետության ոստիկանությունը, 5-րդ և 7-րդ կետերով սահմանված տվյալների տրամադրման պատասխանատու մարմինն է Հայաստանի Հանրապետության աշխատանքի և սոցիալական հարցերի նախարարությունը, 6-րդ կետով նախատեսված տվյալների պատասխանատու մարմինն է Հայաստանի Հանրա-

պետության կառավարությանն առընթեր պետական եկամուտների կոմիտեն, իսկ 8-րդ կետով նախատեսված տեղեկությունների տրամադրման համար պատասխանատու մարմինն է Հայաստանի Հանրապետության արդարադատության նախարարությունը: Նշված մարմինները պարտավոր են տվյալներն տրամադրման ժամանակ տվյալներն ապահովել ոչնչացումից, տվյալների խեղաթյուրումից, բացահայտումից և տվյալների չթույլատրված մուտքից կամ այլ չթույլատրված օգտագործումից:

10. Սույն իրավական ակտում նշված տվյալները տրամադրվում են վարկային բյուրոյի կողմից կոնկրետ անձի կամ անձանց վերաբերյալ համապատասխան հարցում կատարելու միջոցով՝ բացառությամբ քաղաքացիական կացության ակտերի պետական գրանցման մարմինների կողմից անձի մահվան պետական գրանցման մասին և անձի անվան փոփոխման մասին տեղեկությունների, որոնք տրամադրվում են անկախ վարկային բյուրոյի հարցումներից: Հարցման մեջ պետք է հստակ նշվեն անձին վերաբերող այն բոլոր անհրաժեշտ տվյալները, որոնք հնարավորություն կտան նույնականացնելու անձին (այսուհետ՝ հարցում): Հարցման պատասխանը տվյալ իրավասու մարմինը տրամադրում է հարցումն ստանալու օրվան հաջորդող 5 աշխատանքային օրվա ընթացքում:

11. Հարցումը, հարցման պատասխանը, ինչպես նաև սույն իրավական ակտի 8-րդ կետով նախատեսված տեղեկությունները տրվում են էլեկտրոնային եղանակով էլեկտրոնային թվային ստորագրությամբ և գաղտնագրված:

12. Վարկային բյուրոյի կողմից հարցումների ուղարկման և հարցումների պատասխանների տրամադրման, էլեկտրոնային ստորագրության կիրառման և գաղտնագրման կարգը սահմանվում են վարկային բյուրոյի և համապատասխան պատասխանատու մարմնի միջև կնքված պայմանագրով:

13. Վարկային բյուրոյի կողմից հարցման արդյունքում ստացված տվյալների փոփոխման դեպքում համապատասխան պատասխանատու մարմինը պարտավոր է այդ

փոփոխության մասին տվյալն ստանալու օրվան հաջորդող 15 աշխատանքային օրվա ընթացքում այն տրամադրել տվյալ վարկային բյուրոյին՝ առանց վարկային բյուրոյի հարցման:

IV. ՀԱՆՐԱՅԻՆ ՏՎՅԱԼՆԵՐԻ ԲԱԶԱՆԵՐԻՑ ՏՐԱՄԱԴՐՎՈՂ  
ՏՎՅԱԼՆԵՐԻ ՀԱՄԱՐ ԾԱԽՍԵՐԻ ՓՈԽՀԱՏՈՒՑՈՒՄԸ

14. Վարկային բյուրոն պետք է փոխհատուցի սույն իրավական ակտի 3-րդ կետով նախատեսված պատասխանատու մարմինների կողմից համապատասխան տվյալների տրամադրման հետ կապված ծախսերը՝ բացառությամբ սույն իրավական ակտի 8-րդ կետով նախատեսված տվյալների տրամադրման դեպքի: Այդ ծախսերը չպետք է գերազանցեն համապատասխան պատասխանատու մարմնի կողմից այդ աշխատանքի կատարման հետ կապված գումարը: Նշված հարցերը կարգավորվում են վարկային բյուրոյի և համապատասխան պատասխանատու մարմնի միջև կնքված պայմանագրով:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ԿԱՌԱՎԱՐՈՒԹՅԱՆ ԱՇԽԱՏԱԿԱԶՄԻ  
ՂԵԿԱՎԱՐ

Դ. ՍԱՐԳՍՅԱՆ